



UNIVERSITÄTS-
BIBLIOTHEK
PADERBORN

Institutiones Canonicae

Schnorrenberg, Anno

Coloniae, 1740

§. 4. De Vicariis Religionum.

[urn:nbn:de:hbz:466:1-62040](https://nbn-resolving.org/urn:nbn:de:hbz:466:1-62040)

poralem constituere potest? *Re. 1mo.* Parochus ob necessarium impedimentum temporalem Vicarium, dummodò is aliàs ab Episcopo approbatus sit, ad breve tempus suo loco constituere potest. *2do.* Parochus sine consensu Episcopi ad longum aliquot mensium tempus Vicarium sibi substituere non potest, ut colligitur ex *Trid. Sess. 27. de reform. cap. 1.* ubi decernitur Parochos à suis Ecclesiis abesse non posse, nisi per duos vel tres menses de licentia Episcopi, & relicto Vicario ab Episcopo deputando. *3tio.* Ad Ordinarium quoque pertinet, parochi defuncto, curam animarum idoneo committere Vicario, donec de proprio Rectore provideatur. *Trid. Sess. 24. de reform. cap. 18. 4to.* Defuncto

Vicario perpetuo Vicarium temporalem substituere pertinet ad Prælatum Ecclesiæ vel Monasterii, cui Parochiale est unitum beneficium. *Barbosa cum aliis.*

Quæres *duodecimo.* An Vicarius Vicarium sibi constituere possit? *Re.* Vicarius perpetuus, si à Parochia sua ad breve tempus absit, Vicarium sibi substituere non prohibetur, eò quòd Parochi æquiparetur. Vicarius temporalis, etsi tanquam delegatus ad universitatem causarum, quando functionibus suis peragendis non sufficit, cooperatorem assumere, eique partem jurisdictionis subdelegare valeat, de jure tamen Vicarium etiam ad breve tempus substituendi non habet potestatem.

S. Quartus.

D E

Vicariis Religionum.

Quæres *primo.* Qui dicuntur Vicarii Religionum? *Re.* In Religionibus illi dicuntur Vicarii, qui alicujus Prælati Regularis vices agunt; cum enim ipsi Prælati per se nec ubique esse, nec disciplinæ actionibusque Regularibus intendere valeant, licet Vicarios constituunt, in quibus & per quos velut oculus speculantur, & velut manus subditorum salutem & Ecclesiæ commissæ bonum ac incrementum sedulò operantur.

Quæres *2do.* Quotuplex Vicarius Religionum? *Re.* Juxta differentiam Prælatorum Regularium alius est Vicarius Generalis, alius Provincialis, alius Vicarius Prælati localis.

Quæres *tertio.* Quotuplex est Vicarius Generalis? *Re.* 2plex: Alius enim est Vicarius Generalis per constitutiones Ordinis sui positus, vel ad hoc electus & confirmatus, vel à summo Pontifice constitutus, ut v. g. Sede Generalis vacante, vel illo suspenso aut impedito vices agat Generalis, deinde alius est Vicarius Generalis, qui non jure vel statuto Ordinis, nec per electionem, sed solùm per nominationem Generalis fiunt, quod à Generalibus fieri posse probatur *arg. cap. quoniam, 14. cap. inter cetera, 15. de offic. Jud. ordin. Arg. cap. cum Episcopus, 7. eod. in 6.*

Quæ-

Quæres quarto. Quam habet potestatem Vicarius Generalis à jure constitutus, aut electus? *R.* Vicarius Generalis per statuta Ordinis datus, aut electus & confirmatus, vel à summo Pontifice constitutus jurisdictionem habet ordinariam delegabilem, quæ nec morte Generalis expirat, nec eo suspenso aut impedito exercitium amittit. Ratio ex generali sumitur regula: Jurisdictio ordinaria est, quæ vel ex lege vel Canone, aut officio legibus erecto, vel ex supremi competit Principis commissione.

Quæres quinto. Quam potestatem habet Vicarius Generalis à solo Generali nominatus? *R.* Hic Vicarius Generalis, sive pro toto Ordine, sive pro aliqua tantum Provincia sit institutus, solum delegatam habet jurisdictionem à Generalibus amovibilem, nec eam subdelegare possunt, nisi pro casu quodam particulari, si ad universitatem causarum sint delegati. Illorum potestas morte Generalis expirat. Si tamen statuta Ordinis, vel decreta Capitulorum Generalium statuerent, ut tales Vicarii à Generali constituti, in casu quo Generalis mortuus, officium suum exercere, & vices Generalis, usque dum novus confirmaretur, supplere pergerent, tunc defuncto Generali jurisdictionem habent ordinariam, scilicet ex jure Ordinis per decreta Capitulorum generalium constituto.

Quæres sexto. Qualem potestatem habet Vicarius Provincialis? *R.* De illo eodem modo loquendum, si jure Religionis per constitutiones Ordinis, vel per electionem est Vicarius Provincialis positus, ordinariam habet jurisdictionem, ille autem, qui à Generali vel Provinciali

impedito, ut ejusdem vices gerat, constitutus est, delegatam solum exercet jurisdictionem.

Quæres septimo. Quæ potestas Vicarii Prælati localis eo præsentis? *R.* Vicarius Prælati localis, ut Prior claustralis subiectus Abbati, Supprior subditus Priori Conventuali, Vicarius in Ordine S. Francisci Guardianus, Minister in Collegio Societatis, dum Prælati in Monasterio adest, nihil possunt quoad ea, quæ ad jurisdictionis pertinent potestatem, nisi quantum illis ab eodem Prælati committitur; proprium enim eorum munus est curare, ut Regularis observantia in domo & Conventu exactè observetur.

Quæres octavo. Quid possunt Prælati absente? *R.* Abbate vel Superiore locali absente, nisi ille alium pro Vicario substituerit, Vicarii temporales tempore absentis possunt ea ex delegatione in casibus occurrentibus, quæ Prælati possent præfens jure ordinario.

Quæres nono. Quid possunt Prælati vacante? *R.* Quando Monasterium Prælatum Conventualem non habet, vel quia vitâ functus est, vel suum munus absolvit, vel ab eo amovus fuit, tunc penes claustralem Priorem totam jurisdictionis potestatem esse, sustinet *Tambur. de jure Abbatum. tom. 2. disp. 1. q. 4. n. 4.* Quod aliter verificari non potest, quam per consuetudinem aut particulare jus Religionis, quod Vicario Prælati in tali casu, quamdiu Sedes vacat, jurisdictionem defert, & ita ex lege ordinariam obtinet jurisdictionem. Ita in Ordinibus Mendicantium absoluto triennio Superiorum localium, antequam novi instituantur.

tuantur, jurisdictio Prælati localis est penes Vicarium, qui tunc Vicarius in capite vocatur, & ordinariam Prælati localis habet jurisdictionem.

Quæres decimo. An Priores possint esse perpetui? R. Priores, qui instituuntur perpetuo per Canonicam electionem Capituli & confirmationem Superioris, perpetui sunt. Et de his procedit *cap. Monachi. 2. de statu Monach. junctâ gloss. verb. non mutantur. ibi*: "Priores, cum in Ecclesiis Conventualibus per electionem Capitulorum suorum Canonicè fuerint instituti, nisi pro manifesta & rationabili causa, non mutantur: ut videlicet si fuerint dilapidatores, si incontinenter vixerint, aut tale aliquid egerint, pro quo amovendi meritò videantur; aut si etiam pro necessitate majoris officii de consilio fratrum fuerint transferendi." Hi ergo Priores populum habere dicuntur, unde auctoritate perpetua gaudent prælationis; sunt enim Ecclesiarum suarum Sponsi, quæ eorum morte viduantur. Alii autem Priores obedientiarum seu claustrales, habentes quidem Religiosos, sed non subditi populum, ad nutum Superioris, à quo constituuntur, amoveri possunt ac debent, juxta *cap. cum ad monasterium. 6. de statu Monach. ibi*: Nec alicui committatur aliqua obedientia perpetuò possidenda, tanquam in sua sibi vita locetur, sed cum oportuerit amoveri, sine contradictione qualibet revocetur.

Quæres undecimo. Quas qualitates Priores claustrales habere debent? R.

"Prior præ cæteris post Abbatem potens sit opere & sermone, ut exemplo vitæ verboque doctrinæ fratres suos & instruere possit in bono, & à malo etiam revocare, zelum Religionis habens secundum conscientiam, & delinquentes corripit & castiget, obediētes foveat & confortet." *Ita cit. cap. cum ad monasterium.*

Quæres duodecimo. An & qualiter Priori claustrali obediendum? R. Licet Caramuel in *Regul. S. Benedicti. n. 739.* velit Conventualem non teneri obedire Priori claustrali, nisi in foro externo, quia in omnibus, inquit, quæ Prior injungit, non nisi Patremfamilias imitatur. Unde Priores possunt præcipere sub præcepto ad 4tum Decalogi pertinente omnia illa, quæ ordinantur ad utilitatem, bonum, & pacem communitatis, ita, ut qui talia præcepta violaverit in materia gravi, non peccet mortaliter contra votum, sed tantum contra quartum Decalogi. Hæc ille. Probabilius tamen est, quod Priori claustrali vi voti obedientia sit præstanda; potestas enim ejus est dominativa, utpote participata à potestate, quæ est in Principali officium Priori committente, qui sicut per semetipsum eam præcipiendi habet potestatem, quæ subditi vi voti obedire tenentur, ita eandem per delegationem in Priorem derivare potest, quod ex eo facere censendus est; quia Abbas cum Priore in rebus Regularibus quasi unam gerit personam.